

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

OKETOPA 2019

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 30 - website: [www.cccs.org.ws](http://www.cccs.org.ws)



O le Aoga Aso Sa a le  
EFKS Fairfield, o loo  
galulue ai le Susuga ia  
Peletisala Lima ma le  
Faletua ia Michiko Ete  
Lima.

“Ina tuu maia o tamaiti e  
omai ia te au, aua le vavao  
ia te i latou, aua faapei o i  
latou nei o e o i le Malo o le  
Atua.”



**LOTU TAMAITI, EFKS FAIRFEILD,  
SINI, AUSETALIA.**

# FAASINO UPU

1.	FAASINO UPU	2	
2.	LAUGA	2	- 4
3.	ARETO MO LE FANAU	5	- 6
4.	LISIO FAIFEAU MA AOA O UAAVANO A MO AULOTU O LOO TAU SAILI NI O LATOU FAIFEAU.	7	
5.	FETU'UTU'UNAIMUNIAO	8	- 9
6.	ITULAU MO TUPULAGA	10	- 12
7.	<u>O E U A FAI I LAGILE FOLAUGA</u>	13	- 16
	1. SEUMANUFAGAI AUTAGAVAIA FAAMASANI SEUMANUFAGAI FILO		
	2. PUATOLO TOLUMAFAGA TAUA SETEFANO EPATI		
	3. SINA FETOAI TIATIA		
	4. FUAULI JUNIOR TAITO FARENI		

## O LE LAUGA

**Tusi Faitau:** Luka 17:20-37

**Matua:** Luka 17:33

**Manatu Autu:**

### FAASAOGALEMUINA/ FAASAOINA

O lo o feagai pea i tatou ma le lalolagi atoa ma faigata, ona o faalavelave tutupu i taua ma mala faa-le-natura, pei o mafuie, lologa, afa, sunami ma isi e tele.

Tatou te lagona ai lava le popole ma le atuatuva'e, auā ua maumau ai le soifua o nisi, aemaise foi pe a toe oo mai, ma afaina ai o tatou foi ola.

E tatau ona tausia lelei e le tagata lona lava ola, e le gata mo le solo lelei o le olaga, ae ia sili ona aoga mo le Atua, o le ana le ola. O le ola faaaogaina mo le Atua, o le tagata lea ua faatuatua ma alofa ia te Ia. Pe a mavae atu lena ola, o le a faasaoina o ia e le Alii i se ola fou, e mafuta tumau ai ma Ia i lona malo faavavau. Le malo lea na fesili ai le au-faresaio ia Iesu. "Pe o'o mai afea le malo o le Atua? O le fesili o lo o faavae i luga o lo latou lava talitonuina o perofetaga ma folafolaga o mea moni, sa masani ona saunoa i ai Iesu, e uiga

i le malo o le lagi. O lo latou talitonuga, o le a faatuina e le Mesia se malo e vaia e mata pei foi o le tatou malo. Se malo na te faaauauina ma faatumauina le nofoalii o Tavita i le lalolagi. Peitai, ina ua tali atu le Alii ia i latou, sa latou le malamalama i ai, auā ua le ia i latou le Agaga o le Alii, e iloa ai mea lilo, ona o lo latou tetee ma luitauina pea e o latou manatu sese, molimau ma aoaoga moni a Iesu. Fetalai Iesu – "E le oo mai le malo o le Atua ma le vaia e mata."

O le finagalo o le Alii, o le malo o le Mesia, o le malo faa-le-agaga. E le se malo faa-le-tino nei e femoumouai ma faalialiavale i ana atina'e ma ana tulafono le faavaea i le alofa o le Atua.

# O LE LAUGA

O le malo ua saunoa i ai Iesu, o le malo e amata i le galuega a le Agaga o le Atua i loto o tagata, ma le feso'ota'iga o le tasi i le isi, aemaise i le Atua i taimi uma o le ola. E le gata i lena, ae ao foi ina vaai ifo le tagata ia te ia lava, po o faapefea ona faia e le Atua mea lelei ma le matagofie i lona loto. A oo ina ulufale mai i le loto o le tagata, e filemu lona oo mai e aunoa ma ni mea faapapa, e aunoa foi ma se pisapisao ma le malomaloa. E ui lava i lo latou manatu e tulaga ese lona afio mai, e faamalieina ai i latou pe a oo i lea taimi, ae le o le finagalo lea o le Atua ua fia momoli mai mo le ola o tagata uma i le lalolagi. Ia le fai ane foi se tasi, a mea o iinei po o iila, po o se si nofoaga faapitoa, ua i ai le malo.

Soo se tagata e tutumau i le olaga faa-kerisiano ma le mafutaga o le au faatuatua i soo se siosiomaga, e lagona lava e lona toto aafiaga faa-le-agaga. O le pogai lena na fetalai atu ai Iesu i le au faresaio – “Faauta, ua i ai lava ia te outou le malo o le Atua.” O le faamanatu foi lea a le Alii mo i tatou lana ekalesia faatuatua.

O le malo o le Atua, o le nofo tupu lea o le Atua i le loto o le tagata, ua fai Iesu ma ona Alii ma taitai i taimi uma o lona ola. O lona uiga, soo se tagata ua liliuina mai le olaga tuai, ma fulitua atu i le agasala, o

ia lava o se sitiseni fou o le malo o Keriso.

O le galuega talai a Iesu i le lalolagi, sa ia a'oa'oina ai tagata, ma fasino tagata i le ituaiga ola e viia ai le Atua, ma faasaoina ai le ola mo le Atua ma lona malo. Na ia folafola ma lauga atu le Tala Lelei. Na molimau le silasila ma le faalogo a tagata i vavega e tele na Ia fai, ma na taliaina e le toatele o tagata. Ui lava ina tuputupu pea tagata ua salamo ma faatuatua i le Alii, ae sa i ai lava tagata le talitonu, o e na tetee mai i le talaiga. Peitai na silafia e le Alii, o le tumau pea ia te ia i le taimi nei, e faaatoatoa lava e le Alii lona tau, i le iuga faavauvau o lona malo i le lumanai.

O le finagalo foi lea o Iesu mo ona soo, e a'oa'oina ai latou mo so latou malamalamaaga ma faamanuiaga i le galuega talai. E ui lava i so latou mana'o tele ia iloa le atalii o le tagata, latou te le iloa lava, aua o Keriso ma lona malo, e le vaai iinei poo iila poo se nofoaga faapitoa. Peitai o lona faaailoa mai, e lautele atu i soo se vaipanoa o le ola.

Pe a foi mai foi nisi ia i tatou, ua toe afio mai Iesu iinei pe faapea foi o iila, ua a'oa'o mai le alii ia i tatou, ma vavao mai lo tatou mulimuli atu i ai. O lona toe afio

mai, ua faapei o se uila e emo mai le tasi itulagi, ma malamalama ai le isi itulagi.

E le tau sailia solo poo fea tonu e afio mai i ai. E le faailoaina atu foi e le tasi i le isi tagata, aua o fea lava e iai le tagata, e iloa atu lava Iesu mai soo se mea o tu ai.

O le faamoemoe lea o le malo o Keriso pe a toe afio mai, e le mo se manuia o se tagata e toatasi, ae o se lelei mo tagata uma ma atunuu uma.

Peitai, sa muai tiga lava le Alii i mea faigata e tele na lafotuina ai e tagata Iutaia le talitonu lona soifua. Ui i lea, sa manumalo lava lana Tala Lelei, i e na tetee mai, ma viia pea lana pule faa-mesia mai le lalolagi tuai, pei foi ona i ai i aso o Noa ma Lota i Sotoma.

Tatou te le iloa le taimi o le toe afio mai o Iesu, peitai, e i le pule tutasi a le Atua lona afio mai i le aso, taeao, poo se seneturi i le lumanai. O le a lava le taimi e afio mai ai, ao faapea ona faapaiaina lo tatou ola, ma saunia faale agaga i tatou. Ia afio mai ao tatou galulue, auauna ma faamaumau lo tatou ola mo ana feau. O le faatusatusaga i le va oi latou uma ua latou faamaopo i amioga taatele o le olaga, ma i latou ua matua tiai ese uiga vaivai ae mulimuli atu i le Alii, na iloa manino ia noa le auauna a le Atua, ma le toatele o le lalolagi tuai. Le ata lava lea e tasi na iloa i le va o Lota ma e na i Sotoma Komoro. O le finagalo o le Alii, afai ua tatou manatu e faasaoina le ola i le tausisia o amioga ua faasino mai e lo tatou

# O LE LAUGA

lava poto, o se taimi maumau lea ia i tatou.

O le iuga lava o le faa-le-lalolagi, i fiafiaga, fia tautaua, ma le logovii, o le iuvale. Ae sili ona leaga i lena, le leiloa ai o lou agaga ma faasalaina ai oe ma au e faavavau. O le faamoemoe o lo tatou ola mai le alii, ia viia le Alii le Atua, le na faia i tatou ma faapaia o tatou tagata lilo, e faia lona finagalo. O o tatou ola, oi ona lava aao, aua ua uma ona Ia folafola mai, na te faaopoopo mea uma tatou te manana’o ai, pe afai tatou te muai saili lona malo ma lana amiotonu. O iina tatou te manino ai ma le faatuatua, e iai le iuga manuia o lo tatou ola o finagalo ai le Atua mo i tatou.

O le taunuuga e ala i lona faasaoina o tatou agaga, e mafuta tumau ai e faavavau ma le Alii i le lagi. E silafia e le Atua o tatou loto uma, aua e ati lana silafaga i loto. Na te silafia le tagata ola faapaiaina ma le tagata ola le mama. O se eseese e le faigata ona iloa, pe afai e faafuasei ona toe afio mai le Alii. E i le moega e tasi tagata e toalua, e avea le tasi, ae tuua le tasi. E olo saito faatasi fafine e toalua, e avea le tasi ae tuua le tasi, e faapena foi i le toalua na galulue i le vao.

O le toe afio mai o Iesu, e le mafai ona taofia e se tasi ma e le ma alofia lava i le taimi ua Ia finagalo iai. O

lana faamasinoga tonu, na te saunia ai le nofoaga paia ma mamalu faa-le-agaga, e alala tumau ai ona tagata filifilia ua faasaogalemuina. O ē ua tuua, e fano lava i latou i le malaia tele, auā o le tau i o le agasala o le oti. Na fesili soo o Iesu ia te Ia, po o fea e fai ai ia mea ua Ia fetalai iai. Na tali le Alii. “O le mea o i ai le tino, e aofaga i ai aeto.” (Mataio....tino oti) ua faaoga e Iesu se tasi o muagagana masani faa-Iutaia, e faamanatu ma a’oa’oina ai tagata uma. Po o fea lava e i ai tagata agasala, e maua lava i latou i faamasinoga a le Atua, faapei o se tino oti e sosogi i ai manu lele feai, ma faatasitasi i ai e fai ma a latou mea e ‘ai. O le faamasinoga a le Atua, e le lafi ai se tagata. O se taimi e ta-vavaeseina ai ona fili ma e ua talitonu i le paia ma le alofa o le Atua.

O e sa ola faapaiaina ua faasaoina i latou e ulufale atu i le oliolisaga o Keriso. O fea lava e i ai le Tala lelei a le Alii, e i ai foi Keriso, faatasi ma ana sauniga paia ma lana ekalesia. Ia tatou talitonu foi ma le faatuatua, o lo o tatou i ai ma le Alii, i o tatou faiva tauave, i o tatou aiga, a le ekalesia, pe a fai tatou te lagonaina le paia o o tatou olaga, i nafa ua galulue ai. O le malo o le Atua, e le tasi sona nofoaga faapitoa, faapei o Ierusalem na totonugalemu i ai

le lotu a Iutaia. Peitai, o fea lava e folafola ai le Tala Lelei o le faaolataga na faia e Keriso, o iina foi o le a talia ai e agaga o tagata Keriso, auā ua faatuatua i lona alofa tunoa. E faamanuia foi le Alii i le tagata faatuatua, auā na ola i ala tonu e faasaoina ai o ia i le malo mamalu.

O le faamanatu foi lea mo i tatou le au uso. O a foliga o le olaga i le siosiomaga o e iai? Po o e ola ea ma le mautinoa, o loo sao le ala o e savali ai mo le faasaoina o lou agaga? Po o faataataa ea le olaga, pei o le au-faresaio, e mumusu e faalogo i le Alii? Manatua le au uso e, o le ola moni, ua na o Iesu lava e maua ai. Tautuana ma i tatou le Alii na ia faia le faaolataga mo o tatou olaga agasala. Na ia muai afio mai ma maua faatasi ma i tatou, ina ia tatou iloa le ala tonu e faasaoina ai tatou. Po o faamaumau ea o tatou ola mo le alii ma lana Tala Lelei. Ona o Iesu. Amene.

## Saunia:

**Maleifua Lomitusi Tanielu (FS)  
Faatonu A’oa’oga Kerisiano**

## Quote:

**Hebrews 10:23**

**Let us hold  
unswervingly to the  
hope we profess, for he  
who promised is  
faithful.**

---

# ARETO MO LE FANAU

---

## O LE MANUIA MO ASO NEI

### ALOFA ATU I ISI.

Ua faapea mai le faamaninoga a le tasi alii atamai e uiga i le alofa, "O le alofa e le mafai ona fesili ane pe fia ni mea e tatau ona ou faia? A e tatau ona faapea ane pe fia ni mea e mafai ona ou faia?"

Ua silia nei i le fa selau tausaga talu ona mafatia le aai o Lonetona i se oge tetele, sa maliliu ai ni tagata e toatele. Na malosi tele le salalau o le oge ma ua mafatia ai le toatele o tagata i lea mala. O lea ua sosola ese ai le toatele o tagata i nuu i tua. E oo i le tupu tama'ita'i na sola foi o ia i le isi nuu i tua e i ai le isi ona maota. Ona o le fia saogalemu tele o le tama'ita'i, na ia faatonuina ai ana leoleo ina ia fausia ni puipui e siomia ai le lumafale o lona maota. Na tusia foi i lumafale o le maota se faaaliga e faapea, "Afai e ulufale se tasi mai Lonetona i le maota ua i ai le tupu tama'ita'i, o le a lafoaina o ia e leoleo i lalo o le vanu loloto e oti ai." Talu ai lava le fefe tele o le tama'ita'i, na ala ai ona manatu faapito o ia ia te ia lava.

Peitai, sa i ai pea i Lonetona nisi alii ma nisi tama'ita'i sa le manatu faapito ia i latou lava, ae sa manatu alofa atu i latou i isi. Sa fesoasoani atu ma alolofa atu i latou i isi tagata sa mafatia i lenei mala na ootia ai le aai tele o Lonetona.

Ua tatou faalogo foi i le tala i nisi tinā na lauiloa i aso ua mavae i le taua ia i latou o le a alofa atu i

isi tagata mafatia e pei o le tinā o TinaTiresa i Initia ma le isi e igoa ia Raulu lea mai le nuu o Suetena. O ia lea na ia laveaina le selau afe o tagata lutaia mai le pule sau a Hitila i le nuu o Hungary. E mafai ea ona tatou faapei o i laua ia atoa ma isi i le agaga o le alofa atu i e ua mafatia: Atonu e le mafai ona tatou faapei o i latou ia.

Pe'ita'i, o lo latou alofa atu isi, e taitaina ai i tatou e vaai ia Iesu o le na muai faatino mai le alofa i lona liutino ma lona maliu i le satauro mo i tatou. O le ootia o o tatou loto i Lona alofa mai ia i tatou e mafai ai e i tatou ona lagona foi le taua ma le lelei o le alofa atu i isi. O le alofa atu i isi i le suafa o Iesu Keriso, o se alofa taua tele lava. O le finagalo o le Atua ia avea i tatou o e alolofa atu i e vaivai ma matitiva e ala i soo se mea tatou te maua e fesoasoani ai ia i latou.

### ALOFA ATILI

O nisi alii fagogota Peretania na faia sa latou fesoasoani i se vaa Sepania na goto i se matagi malosi na suatia ai le latou vaa. Na tau valaau atu ia alii fagogota i le vaa afatia, ae leai se isi na tali ane i ai. Ina ua oo atu i latou i luga o le vaa, na latou maua se vaaiga ofoofogia, o se tagata ua matua faapupuu lelei ma ua saisaitia atoa lona tino faapupuu i ona palagitete. Na vave ona fesoasoani atu nei aliifagogota i lea tagata ma ua mafai ai ona toe ola; ao lea e i ai foi ma le isi e fia ola. Sei faola ane ma laveai ia te ia."

O le mea taua i lenei tagata ua toe ola, ona ua na muai faaaogaina lona tau manava ae muamua lava, e le mo lona fia

maua o se mea ai poo se vai inu, po o se moega mago e mapu i ai, a ua na muai faaaogaina lona avanoa mo le laveaiina o le isi ona uso mafatia. O le alofa e faaaliga e le gata i mea tetele ma le lauiloa, a e vaaia foi i nai mea laiti ma le faatauvaa e tutupu i aso fai soo. Ua fai mai Paulo i le Efeso 4:2. "Ia outou loto maulalo ma agamalu ma onosai. Ia outou faapalepale le tasi i le tasi i le alofa."

O le alofa moni faa-Kerisiano, e le faigofie ona oo mai, peitai ua ia i tatou se Faiaoga aupito sili i lenei lalolagi, e pei ona fai mai ai Paulo, "Ua aoaoina outou lava e le Atua ia outou fealofani." 1 Tesalonia 4:9. Faapefea ona faia e le Atua lea mea?

Ua tatou iloa i le Tusi Paia, na la faaalitinoina mai Lona alofa e ala ia Iesu Keriso, na puapugatia ma ofoina mai lona ola mo lo tatou faaolatagta. O Iesu lava na fetalai mai, "Afai tou te alofa mai ia te au ia outou tausi i au poloaiga." E le i gata ai iina, a ua fai mai atili, "Ou te fai atu foi i lou Tama ona foai mai lea o la le tasi fesoasoani ina ia tumau pea o la ia te outou e faavavau." Ioane 14:15, 16. Ua faaopoopo foi i ai Paulo i le Roma 5:5 "O le faamoemoe foi e le ma ai; auā ua faamaligi mai le alofa o le Atua i o tatou loto e le Agaga Paia ua foaiina mai ia te i tatou."

O le Agaga Paia lea ua nofo i totonu o i tatou o le tatou Faiaoga lea. O la na te aumai ia i tatou le malosi ma le mana e alofa atili ai e ala i le Upu, e ala i le Papatisoga, e ala i le laoi a le Alii, e tumau ai pea lo tatou fesoosootai pea ma lenei Faiaoga o le Alofa atili.

**Saunia  
Vaalotu Taulapapa (FS)  
Faifeau Penisione**

---

# ARETO MO LE FANAU


---

**(a) O a tatou tatalo e ao ona fai i le Atua?**

Na faia e Farani ana tatalo i lona moega ina o le a moe i le tasi po, ina ua faatoa fa ona tausaga. Na tatalo o ia ia Iesu Keriso faapea, faamolemole Iesu, aumai sau pasika. Ona fai atu ai lea o lona uso matua, “E le talia lau tatalo e le Atua; aua e le faia i le lagi ni mea faapena.” Ua fai atu foi lona uso i lona tina, “E sao au tinā a ea?” Ona fai atu lea o tinā ia Farani, Ia e talanoa mai ia maua ma tamā ona tatou mafaufau faatasi lea i ai. Ona fai ane lea o le uso matua, “O lou manatu foi lena, auā o se mea uiga ese lea.”

Ona fai atu lea o Tamā, “O le Atua o loo tatou Tama faalelagi e mafai ona talanoa i ai i tatou ia te Ia e pei lava ona oulua talanoa mai ia te au.” E finagalo o Ia ia tatou tatalo so’o pea ia te Ia. E mafai ona tatou tatalo ia te Ia e tusa ma lagona o o tatou loto. E mafai ona tatou ta’u ia te Ia nisi mea tatou te naunau i ai a e le aoga tele, pe iu foi ina tatou leaga ai. O lea e pule lava le Atua i le tali mai i a tatou tatalo e tusa ma Lona silafia o le mea e sili ona tatou lelei ai. Ona o tatou o le fanau a le Atua, e tatau ai ona tatou tatalo ai ia te Ia mo mea e lelei mo i tatou ma isi foi. O se mea sese tele pe a tatou tatalo mo ni mea e leaga ai tatou atoa ma isi. E faafofoga mai pea le Atua pe a tatou tatalo atu ia te Ia e ala ia Iesu Keriso, e talia e Ia a tatou tatalo, peitai e tali mai o Ia e tusa ma lona lava silafia lelei o mea tatou te lelei ai.

O nisi aso e tali mai ai o Ia i le leai, auā ua na silafia lelei e leaga ai tatou. O nisi aso e tali mai ai o ia i le aumai o se isi mea e sili atu i lo le mea na tatou ole atu ai. O nisi foi aso e tali mai ai o Ia ia i tatou ia tatou onosai sei oo mai le aso tonu e fetau lelei ai lou manao e tali mai lava o Ia e tusa ma lona silafia lelei o mea tatou te manuia ai.



**(e) O le Suafa Paia o le Atua:**

O le suafa sili lava o le Atua o le Atua lava. O le tala i le faaali atu o le Atua ia Israelu i luga o le mauga o Sinai, ua vaaia ai le paia tele o le suafa o le Atua. E te iloa le mamalu tele o le suafa o le Atua na faaali mai i lena mauga? Na matua luluina le mauga na ili ai pu, na papa ai faititili ma feemo ai uila. Na matua ofo tele le nuu o Israelu ia mea na oo mai.

Ona fetalai atu lea o le Atua ia Mose, o le a tau atu ia te ia Lona igoa. Ona usu po ai lea o Mose i luga o le mauga o Sinai. Na a’e e ia o papa ma’a e lua e tusia ai e le Atua o tulafono e Sefulu. Na o Mose lava na alu ae i luga o le mauga.

Ona iloa ai lea e Mose le ao faaniutu ua alu ifo i luga o le mauga ua oo ifo i luga o lona ulu. Ona

tau ane ai lea e le Atua o lona igoa ia Mose. “O a’u o le Alii, o le Atua alofa fua e telegese le toasa, ae tele pea lona alofa i afe o tupulaga, e faamagalo foi i le amioletonu ma le solitulafono ma le agasala.”

Ina ua faalogo atu Mose i le siufofoga o le Atua ona matua fefe ai lea o ia, ona o le paia. O i latou uma e soona tau lona suafa o lo latou faaleagaina foi lea o Ia lava. Ona o le Atua e paia, o lea e tatau ai i tagata uma ona ava i ai ma ia taupaiaina lona suafa.

O le mea muamua lava lea na finagalo ai Iesu ia tatou faia e pei ona Ia faaalua mai i lana tatalo. Lo matou Tama e, o i le lagi, ia paia lou suafa. O lona uiga, ia faapaiaina pea lou suafa.

**TALANOAILENEIMEA:** O le a le mea na fai atu ai le Atua ia Mose i luga o le mauga o Sinai? O le a le mea na fefe ai Mose? O le a le mea na fai atu ai le Atua e uiga ia te Ia lava? Ai se a e paia ai pea le suafa o le Atua i lana fanau? (Faitau Esoto 34:6)

Saunia  
Vaalotu Taulapapa. (FS)  
Faifeau Penisione





# **FAIFEAU MA A'OA'O I'U MAI MALUA UA** **AVANOA MO AULOTU O LO O TAU SAILI** **NI O LATOU FAIFEAU.**

Ua taoto le i'ugā fono a le Komiti o Feau Eseese (KFE 05/134) ina i fa'aalia i le Sulu Samoa suafa o faifeau ma a'oa'o ua i'u mai Malua e le'i penisione mo le silafia e aulotu, auā a latou filifiliga mo ni a latou faifeau. O nisi nei na mafai ona maua mai:

## **OFISA TUTOTONU EFKS TAMALIGI.**

1. Vavatau Taufao (FS) – Failautusi Aoao EFKS
2. Rimoni Wright (FS) – Teutupe EFKS
3. Epati Setefano (FS) – Komesina Fanua ma Fale EFKS
4. Anzac Tuala (FS) – Failautusi Fesoasoani
5. Vaai Tua (FS)
6. Risatisone Taua (AM)
7. BJ Faau (AM)
8. Ututau Tauati (AM)
9. Faamoana Fuimaono (AM)
10. Senitenari Autagavaia (AM)
11. Ulale Sakaio (FS)
12. Peniamina Neuli (FS)
13. Steve Palala (AM)
14. Fiamalua Peleseuma. (AM)
15. Panapa Panapa (AM)
16. Onosa'i Nofoaiga

## **OFISA A'OA'OGA KERISIANO**

1. Maleifua Tanielu (FS) – Faatonu
2. Peteru Seiuli (FS)
3. Ietitaia Solipo (FS)
4. Semikueva Sua (FS)

5. Isamaeli Aulai (FS)
6. Apelu Lelevaga (FS)
7. Enoka Aperamo (FS)
8. Satala Sa'u (FS)
9. Farani Pauga (FS)
10. Panapa Alafau (AM)
11. Vaegatootoo Magele (AM)
12. Keresoma Seuala (AM)
13. Faalefu Tumumalie (AM)

## **EFKS TV**

1. Vaasaumamao Lafaaua Sia (FS)
2. Elekana Leaaliifano (AM)

## **MALUA PRINTING PRESS & BOOKSHOP**

1. Aokuso Lee (FS) - Pule

## **KOLISI TUASIVI**

1. Piula Pula (FS)
2. Setefano Logovii (FS)
3. Enele Auvaa (FS)
4. Faisiota Autagavaia (FS)

## **KOLISI TEINE PAPAUTA**

1. Kuresa Tavalani (AM)

## **KOLISI NUUAUSALA**

1. Fuatimu Posese (FS)
2. Motusaga Lesa (AM)
3. Faletoese Faletoese (FS)
4. Eleasaro Eleasaro (FS)

## **KOLISI MALUAFOU**

1. Falaniko Sio (FS)
2. Iakopo Faasalaina (FS)
3. Tafatolu Lelevaga (FS)
4. Epati Sooula (FS)
5. Tanuri Pesaleli (FS)

6. Clay Tofilau (FS)
7. Amosa Mikaele (FS)
8. Tia Gatoloai (FS)
9. Enoka Pouniu (FS)

## **KOLISI LEULUMOEGA FOU**

1. Onosai Soo (FS)
2. Oata Tuatagaloa (FS)
3. Francisco Fatu (AM)
4. Vaigafa Paleono (FS)

## **KOLISI FAAFAIFEAU I MALUA**

1. Maafala Lima (FS) – Pule Kolisi
2. Olive Samuelu (FS)
3. Arthur Wulf (FS)
4. Vaitusi Nofoaiga (FS)
5. Latu Latai (FS)
6. Brian Kolia (FS)
7. Taipisia Leilua (FS)
8. Makesi Neemia (FS)
9. Karanita Petaia (FS)
10. Apela Ah Him (FS)
11. Samasoni Alama (FS)
12. Reupena Maulolo (FS)
13. Alesana Palaamo (FS)
14. Visesio Saga (FS)
15. Imoa Emanuel Setefano (FS)
16. Malutafa Faalili Leaupepe (FS)
17. Kara Siaso (FS)
18. Seumaninoa Puaina (FS)
19. Filemoni Crawley (FS)



---

# FETU'UTU'UNAI MUNIAO

---

Kenese 7:1 *“Ua fetalai atu le Ali'i, ia Noa. “Ina ulu atu ia o oe ma lou aiga uma i le va'a aua ua ou iloa o oe o le amiotonu i o'u luma i lenei tupulaga.”*

Ua tatou iloa, o le Aiga o le ulua'i nofoaga lea na fau e le Atua e fa'afailele a'e ai le soifua o so'o se tagata. Le aiga o Atamu & Eva. A'o lea foi ua tatou iloa o le ulua'i nofoaga lava foi lea na fa'aleagaina le mafutaga Paia a le Atua ma le tagata i le amataga, ina ua le usita'i.

Pisapisao le lalolagi i le au terrorisi ma le au fa'apapomu ua tele soifua ua ma'uma'u ai. O le fesili.

O fea ea na mafua mai ai? O le upu moni, O le nofoaga lava foi lea na fanau mai ai lenei fili, o totonu o le mafutaga fa'aleaiga a Kaino ma Apelu.

Peitai, ina ua finagalo le Atua e toe fa'afou le lalolagi ua tumu i mea leaga ma le agasala, o i fo'i na afua mai ai, o le mafutaga fa'ale-aiga Noa ma le ava ma lana

fanau. Fai mai le fa'atonuga a le Atua... *“Inā ulu atu ia o oe ma lou aiga uma i le va'a, auā ua ou iloa o oe o le amiotonu i o'u luma i lenei tupulaga.”*

Oka se matua manaia lenei fa'alaniga ua ave e le Atua ia Noa. ‘...o oe o le amiotonu i o'u luma...’

A'e leitioa a finagalo le Atua e fa'aaoga lenei aiga fa'atauva'a e toe fa'afou ai le lalolagi, leaga o le aiga na fa'afoe lana ta'ita'iga i le amiotonu, o le mafutaga na papalu fanau i le alofa ma fafaga i le ola matata'u i le Atua. Le aiga e fa'avae mea uma i le fa'amaoni, ma fa'amuamua le Atua


Ae o se aiga na taimua ai se tama finau, e lei fiugofie i upu faifai a tagata, fai mai o le tamaloa ua leaga lona ulu. Na usitai i le fa'atonuga a le Atua ma punou fa'amaoni e fau le va'a, seia o'o ina fa'asaoina o ia ma lona aiga. E iai le fesili e Masani ai tatou... ‘O a mai si tou aiga?’ O le tali Masani lava; Manuia lava, fa'afetai. E iai

lo'u manatu, e le o aiga uma e fetau iai le tali lea. E fa'afefea ona fai mai, o lo'o manuia, se aiga e misa le ao, misa le po. E manuia se aiga ele fiafia e o ile lotu, ma le fia tautua, ona ole fe'alo'afa'i, ma le ola fa'avaivai? Se manuia le sauaina o fanau mai lava o laiti?. Upu moni ele o manuia se aiga, ele iai se alofa. Manatua, so'o se aiga e fa'amuamua le Atua e manuia...

## Saunia:

**Keneti Leaupepetele (FS)**  
**EFKS Savaia & Tafagamanu-uta**

---





# FETU'UTU'UNAI MUNIAO

(Mo Tupulaga Talavou)

E iai le tala i le ulugalii ma le la fanau ise nu'u o Aferika i Saute. O le tamaloa o le (specialist) o le foma'i fa'apitoa i ta'otoga o ma'i fatu. Ma ose foma'i na matua tautaua i Aferika, ona o le tele o ta'otoga faigata na ia faia ma manuia. O le ala lea na ia malaga ai i Amerika, ise talosaga fa'apitoa ini ta'otoga faigata ua manaomia ai lana fesoasoani. E sili atu ma le ono masina na tu'ua ai e le fomai, lona aiga mo lenei fa'amoemoe taua. Ma o le tala fiafia, e leai se ta'otoga, e lei manuia, ua le gata ina tele tupe ua maua, a 'ua si'isi'i i luga le tulaga ile fa'asologa o fomai lauiloa ile Lalolagi. Peitai, e iai le mea ua tupu, ua avea le pisi tele ole fomai i ona tiute fa'afomai, ua galo ai ia te ia lona aiga, lona to'alua ma lana fanau. Talu ona sau le fomai, e lei toe feso'otai i lona aiga.

Ua sauni le tamaloa e toe foi i lona aiga, ma ua tapena mea uma o meaalofoa a tagata mama'i, aemaise trothies (ipu) na ia maua i le fa'atinoga o lana galuega, aemaise le mau tupe na maua i ta'otoga o tagata mama'i. I le manatu ole fomai, ole a fa'afiafiaina lona to'alua ma lona aiga inei mea.

Ua feiloai le aiga ina ua taunu'u le fomai. Ua o'o ile po ua talatalanoa, e vaai atu lava le fomai e pei ele o fiafia lona toalua, ona ia fesili lea. **"Mom e iai se mea o fa'aletonu, aisea ete mata fa'anoanoa ai, ete le fiafia o lea ua manuia a'u taumafaiga lea ua tele tatou tupe e fai ai mea ete manao ai."** Fai mai le tali ale fafine; **"E sao lelei oe dad, fa'afetai ile Alofa ole Atua, o lea ua e toe foi mai ma le manuia, ua ou iloa i luga ole TV, le manuia o ta'otoga sa e feagai ai, o le tino lea o la matou tatalo ile Atua ia**

**tausia oe, ia viia pea le Atua. Ae vaai oe, talu lava ona e alu ese atu ma lo tatou aiga, ete lei toe feso'otai mai, se telefoni, se text, face bk ua leai. Aisea? Ua alu lou taimi ile togafitiga o ma'i fatu o isi tagata, ma ua manuia, a ua galo ia te oe le fatu o lou to'alua ua matua ta'eta'ei ma fa'anoanoa ina ua le mautinoa, po'o e toe manatu mai pe leai. Aemaise tamaiti e tu'u fesili pea po'o fea oe, pe ete toe sau afea. A'o le fesili a tamaiti e tuia ai lou fatu i taimi uma... 'Mom o alofa mai pea dad ia te oe ma maua, afai o alofa mai, aisea ua le toe vili mai ai?**

O le upu moni ua matua fa'ateia le fomai i tala o lona toalua. Ua nofo ua le tautala, aua ua ia iloa e sao lelei le fafine, ma ua ia lagona ifo lona le fa'amaoni i lona to'alua ma si a la fanau. Ia, o lea le aoga na manuia ai fatu o isi tagata, ma maua ai tupe e tele, ma meaalofoa, ae ta'eta'ei ma fa'aleagaina le alofa (fatu) o lona aiga. Ua maua tupe sa naunau iai, a 'ua leai se fa'atuatuaina ele toalua ma le fanau. Ua maua le fiafia i mea ole tino, a 'ua pa'u maualalo le ola fa'aleagaga ole aiga. Ua manuia le taumafai, a 'ua galo le na aumaia

manuia. Ua pale ile fa'aeaina ma mamalu, a 'ua mativa ile alofa, ma le amiotonu. O le fa'aaloga ole tagata ua mamao ese ma le Atua.

O le tu'ualalo a le Fetu'utu'unai Muniao, aua lava nei galo o manuia ma tamaoaiga ua tatou maua . O fa'amanuiaga ma meaalofoa a le Atua, e tusa ma lo tatou taumafai, o mea e tausi ai o tatou aiga, tautua ai le Nu'u, ma fa'atino ai le tautua ile Galuega ale Atua. Ae 'aua lava nei galo, le Atua le puna o mea uma, aemaise lava ia tumau pea le mafanafana ole Alofa i totonu ole Aiga.

Po'o lea le tele o tupe ma maua le tamaoaiga, ae a leai se alofa i totonu ose aiga, o lona uiga e le o iai Keriso le matai o aiga manuia uma. Fai mai le Fai salamo... **"E oge mea Leona ta'anoa, ma latou fia a'ai; a e leai se mea lelei e mativa ai i latou o e saili... ma matata'u i le Ali'i."** Salamo 34:10.

**Tusia:**

Keneti Leaupepetele (FS)  
EFKS Savaia & Tafagamanu-uta



## FAASILASILAGA TAU

Faamolemole lava a outou Susuga i Faafeagaiga, manaomia le toe update mai o tatou tuatusi (address) po o pusa meli mo le lafoina atu o a outou Sulu Samoa i masina taitasi, ona e i ai isi tatou sulu (afifi) ua toe foi mai, ona o mafuaaga na : Sui address E iai foi nisi o aulotu e leo maua lava a latou sulu ae o loo lafoina atu pea i masina taitasi, faamolemole manaomia lava le vave feso'otai mai o le Ofisa o le Failautusi Aoao, pe email mai i le [sulusamoa@cccs.org.ws](mailto:sulusamoa@cccs.org.ws) pe afai ua sui la outou tuatusi.

Faia ma le faaaloalo tele  
Ofisa Sulu Samoa



# ITULAU MO TUPULAGA TALAVOU

## O LE ASO, E LE GALO I LE MAFAUFAU

Pale, ina pale, titi e, ina titi, ula e, ina ula.

A matu loimata o timuga pe laufola foi le matagi sa agi faasulusulu, e galo mea uma o le olaga, ae pei o se ata faasolo i lou mafaufau le mafutaga i totonu o le aiga, e fai o le ausage, ao le lima vaivai o nai matua ina aso.

O lou aiga, e le o se aiga e tu malosi pe tele le tamaoaiga, e vaivai ma ausage. Sa amata mai lou olaga aoaoina i le aoga tulagalua a le matou nuu, seia oo ina ou aoga i se tasi o Kolisi maualuga i Apia. Talofa i le alofa faavalea o matua, e usu mai lava le toeaina i le sapelu ma le fana vao, ao lou tina i lana solofanua ma ana pea taga e tae mai ni popo e faatau. E faigofie ona ou iloaina ua lagona lo laua vaivai, ua alu se la faiva, o le toeaina i lana upega fagota ao lou tina ua

uu si ana ola o loo iai fagu mo sea, loli, fugafuga ma isi figota o le sami. O le faamoemoe maualuga lava o nei mea uma, o mea a le aoga.

I po taitasi uma lava, e uma loa la matou meaai, fai loa ma meaaoga. E manatu alofa i matua ma le tapuaiga i le ao ma le po. E pau lava le upu a lou tama e masani ona taia ai ou taliga, "Afafine, ia e toaga i le aoga, e leaga le valea, e ola falolo solo ai i le lumanai". O nei la mau ata eseese, ua pei ai o se pi tautau i lou mafaufau, ua le ese lea ma sau uo, aua a ou usu i le taeao, e ma te solo faatasi, a ou malolo, ma te talatalanoa faatasi, ma a ou moe foi i le po, e ma te aluluga faatasi. E le mafai ona ou faaluaina siufofoga alolofa o nai ou matua, ao taumafai i laua e tosi le alafua o le olaga e ao ina ou

savali ma ola ai i aso uma o lou olaga.

Ua alu aso, sau aso, ae ua lata foi i suega faaiu o le tausaga. Ua lata le aso taupoina mo suega faaiu, ae ou te lei alo atu mo le taua o mafaufauga, o upu mulimuli a si ou tama, "sau ina alu, ia sagai ane ai o le tai, ia osofia moegaluega, ia taia le ulu, sae le vai, ia saa faaoti le uto a le faimea. Aua nei tulia le lauamanu, ae vaai le faamuli o atu, ia tago i le too ae tepa i le ata ma ia pouliuli ou tino ae malamalama ou ala". Ua ou alo faiva ae taputapu ai nai ou matua, e ala i le anapogi ma le tatalo.

Ua maea suega faaiu o le tausaga, ae ua ou mafaufau nei, pe mafai ona ou tauia le afu pau a nai ou matua. O le po o le Aso Lulu, 19 Tesema 2001, sa taunuu mai ai le lisi o e ua faamanuiaina mo le I univesite Aoao o Samoa. O ou matua i lena taimi, ua leai se isi e toe pao pe iai foi se mea lava e tasi e gase, ae ua na o le usu o le faalogo i le siufofoga o le tamalao faasalalau. Ua maua tala, ua faamanuiaina au mo le I univesite o Samoa.

# ITULAU MO TUPULAGA TALAVOU

O lou tina i lena taimi, ua na o le tu i luga ma ususu pei se tagata ua alu le aso o inu, ao lou tama o Lulu, ua na o le sosoo o faafetai i le Atua i lona talimano i talosaga a lana fanau. O au i lena taimi, masalo ua tea mai i lalo uluulu o laau, pasi mai le masina ma fetu ae taunuu atu i le nofoalii mamalu o le Atua lou mimita i lena itula ma lena po. Ua ou lagona le loto faafetai ma le faamanu i le Alii, i lona fesoasoani mai i au taumafaiga.

I oe, e le sili le tai i lo le tapuai, ae o faiva o ai malo,

o faiva foi o ai e falolo. Le olaga sa tau papalu mai ao itiiti, lea ua tali le Atua, ua malo fai o le faiva. O le lulu lava ma loimata, e toe selesele ma le alaga o le fiafia. E leai se mea e maua ma le filemu, pe a le finau ma tauivi, ina ia tini ma taunuu le faamoemoe. Ua tini pao ai nei le uto e pei o le faiva o Tapalega, ua atoa tino o le tama o Vaatausili. Le faamoemoe sa fau ao, fau po, lea ua tonini, tonana, pisipisi, pasapasa, anini, anana. Ua fua mai i fua lelei ma le matagofie, ua faainu

foi matua i le ipu e sili ona suamalie, ma ua la saa ai i maa o malie. Ua malietoa, ua malotau e pei o upu i le Tulatala aua o lea ua logo le tuli i le tata, ina ua tali le Atua i talosaga a lana fanau. A malie sua o le vai, ua faapaleina i le manuia ma le fiafia. O le po o le aso 19 Tesema, 2001. O le aso e le mafai ona galo i le mafaufau.

Saunia:

Tuluvao Faasootauloa

Yr. 13

Kolisi Maluaafou.

(O se tasi nei o Tala o le tauvaga Tusigatala a Kolisi Mauululuga a le EFKS.)



## O LE SALAMO 121

E leoleo mai le Atua i ona tagata



- 1 E faasaga ae o 'u mata i mauga,  
e oo mai ai lo 'u fesoasoani.
- 2 O lo 'u fesoasoani mai le ALII lea,  
o le na faia le lagi atoa ma le lalolagi.
- 3 E le tuuina mai e ia ia mapeva lou vae;  
o lou leoleo e le tulemoe lava ia.
- 4 Faauta, o le leoleo ia Isaraelu,  
e le tulemoe ia, e le moe lava.
- 5 O le ALII, o lou leoleo ia;  
o le ALII, o lou paolo lea  
i lou itu taumatau.

- 6 E le taia oe e le la i le ao,  
po o le masina i le po.
- 7 E leoleo e le ALII ia te oe i mea leaga uma lava;  
e leoleo mai o ia i lou agaga.
- 8 E leoleo le ALII  
i lou ulufafo ma lou ulufale,  
e amata mai nei lava, a e oo i le faavavau.



# ITULAU MO TUPULAGA TALAVOU

## AUA PE SE A LO OUTOU OLA? O LE PUAO LAVA LEA UA ALIALI MAI I SE ITU ASO ITIITI ONA MOU AI LEA.

### IAKOPO 4:14, SALAMO 39:5

Ua e malamalama ia te oe ma le uiga o lou ola? Pule pea oe i lau tali. Fai mai Iakopo, o le puao e aliali mai se itu aso itiiti, ona mou lea. Ao le fai Salamo fai mai e faapei o le tele o le alofi lima e faamatalaina ai le puupuu o le ola ia i latou. O lea ia e talitonu ma ioe o le ola o le mea totino a le Atua na faia i lona faatusa. O le palealii o ana mea ua fai. E pule ai le Atua. Pei o upu a Iopu. "Na aumaia e le Atua ua toe aveeseina e le Atua, ia faamanuina lona suafa."

O le mafuaaga foi lea e soona ola le pulea ma le faapelepele e le tagata lona ola, leaga e le o sana mea totino. E ola soona fai, amio mataga, soli tulafono. O amio tauvalea ai, inu pia ulaula tapaa, fualaau faasaina e le popole pe mai pe afaina ai i mea na te faia auā e le o sana mea totino lona ola, o le mea totino a le Atua

E iai le upu masani ona faalogo pea iai, E soona fai mea a le isi aua e le o sana mea totino pe leaga faitalia ia ma

fai. Ao le Kerisiano e taiala e le lagona alofa e ta'ita'i e le agaga o Keriso na te faia ai le mea lelei i le isi tagata, ae maise ia te ia lava ma le ola o ia te ia. E iai le taimi e aveese ai ma oe, ae toe ave atu le mea totino a le Atua. Uso e, ia ia te oe le manatu, o lou ola o le mea totino a le Atua ua e faaaogaina ma fiafia ai i le lalolagi, ae aua le soona faia, aua e le mafai e lou malosi le potu ma le fanua o aiga ona taofia pe a oo mai le oti.

Ua tuuina mai e le Atua le ola ia te oe, saoloto i le mea e te faia, e te lelei ai, e te leaga ai foi. Auā o oe lava e te faia le filifiliga ma le faaiuga o le mea e te faia. Ae ua fautuaina i tatou e Paulo, "Auā le au uso e, ua valaauina outou i le saolotoga, tau lava ina nei avea le saolotoga ma avanoa mo le tino a ia auauna le tasi i le tasi i le alofa. (Kalatia 5:13, 1 Peteru 2: 16) Pei o e saoloto, ae aua nei fai le saolotoga ma ufiufi o le loto leaga a ia faapei o auauna a le Atua.

O le ola ma lou ola o le mea totino na foai e le Atua mo oe e te faaaoga ma fiafia ai i se taimi i le lalolagi aua e te le tumau i le lalolagi. O le lalolagi nei e saunia ma tapenaina ai i tatou mo le ola e faavavau faatasi ma le Atua.

Manuia le aso.

Tusia:

Solomona Tuatagaloa (FT)  
Faifeau Toeaina Penisione.

**Quote:**

**John 6:35**

**Then Jesus declared,  
"I am the bread of  
life. Whoever comes  
to me will never go  
hungry, and whoever  
believes in me will  
never be thirsty."**



---

# O E UA FAI'ILAGI LE FOLAUGA

---

## SEUMANUFAGAI AUTAGAVAIA FAAMASANI SEUMANUFAGAI FILO

O le tiakono o le aulotu EFKS-AGAPĒ Garden Grove i Amerika. Na soifua mai i lona aiga i Vaitoomuli Palauli Savaii, i le aso 12 o Iulai 1952, ae valaauina e lona Matai i le aso 17 o Aokuso 2019.

O ona matua o Seumanufagai Filo Faamasani ma Eti Ahloon Filo. Na faaiipoipo atu ia Lalotoa Sauila Alualu o Saleimoa, i le tausaga e 1976. Ua atoia ai le 43 tausaga o le la mafutaga. E to'aono le la fanau, e to'atolu alii ma tama'itai e toatolu foi. E 20 fanau a lana fanau.

Na a'oa'oina Seumanufagai i le aoga a le faifeau i Vaitoomuli, aoga tulagalua, ma le a'oga faaitumalo i Palauli. Faaauau ma faaiiina ana a'oga i le Kolisi o Avele, ona faigaluega lea i le Ofisa o Faato'aga a le Malo o Samoa, o ia o se asiasi itumalo.

Ona malaga mai ai lea ma le tina o le aiga i Hawaii i le 1976. Sa galulue i le aulotu EFKS i Honolulu Hawaii, ma faapaiaina ai lo la tofi tiakono i le 1979, e le susuga i le faifeau o Paapaa Sapolu, a'o tasi le Ekalesia Samoa.

Na valaauina e le aulotu le susuga a Sataraka Sataraka e fai ma o latou faifeau i le 1981, ma liliu ai le aulotu i le EFKAS, ma galulue ai lava ma Seumanufagai ma le Tina.

E tele Komiti tumau a le EFKAS, na tofia ai o ia i le tele o tausaga, e pei o le Komiti o Tupe, Komiti o Feau eseese. Na avea foi ma Tiakono Ta'ita'i o le aulotu.

O le 1997, na siitia mai ai Seumanufagai ma le aiga i Amerika, ma galulue ai i le aulotu EFKS Dominques i lalo o le taitaiga a le Toeaina o Liki Tiatia ma le faletua, Pulega Tutotonu, Matagaluega Amerika. Sa avea foi ma tiakono sa lima taumatau i ai le Toeaina ma le aulotu. Na avea foi ma tiakono ta'ita'i i le aulotu, aemaise foi o le Pulega.

O le 2015, na matou galulue ai loa i le aulotu i AGAPE nei. E le po se silafia e lenei Matagaluega, o ia o le Tama o le faifeau a le aulotu. Na filifilia e Tiakono o le Pulega e fai ma o latou ta'ita'i. E tusa ma le 40 tausaga o lana auaunaga faa-tiakono, e le i motusia lava, talu ona avea ma tiakono i le 1979.

Sa auauna i le Ekalesia Aoao, e ala i le Komiti o Feau Eseese, Komiti o Tupe i tausaga e tele. E maliu nei Seumanaufagai, o seei i le Komiti Tupe, sui o Tiakono.

O se tasi sa tua i ai le Tama o le Pulega, ae maise foi a'u nei o le faifeau, ma le aulotu. O lana fautua, o le faamalosi, ma le faafiafia loto, pe a mamafa le galuega. E tele meaalofa a le Atua na foaiina mo ia. O lana vagana fetalai faafaleupolu, ma lana tofa fetalai, sa to'a i ai lenei aulotu, e faapea foi toeaiina ma le aufaigaluega o le Matagaluega.

O le tausaga e 2017, na faailoa mai ai e fomai, ua afaina i le

gasegase o le kanesa o le māmā. Peita'i, e le i avea le tuga o le gasegase, e faafalepuipuiina ai le Tama. Na atili ai lona naunau i le galuega a le Atua ma lona faamalosi. E le i vaoia ai foi lona auai i sauniga i Aso Sa, o Potopotoga a le Pulega ma le Matagaluega, faapea foi fono faafaavae a Komiti Tumau ma le Fonotele i Malua.

O Seumanufagai, o le tagata e fiafia lona olaga. E iloa gofie lava e le matou aulotu, ma le Pulega e faapea foi le Matagaluega, se potopotoga o i ai le toeaina, i lona leo, ma lana 'ata, aemaise o ana tala malie. O le tagata e finau mo mea sili. Tiga ona taumafai ona togafitiga, ae le mafai ai ona taofia lona malaga i Samoa, pe a tutupu mai faalavelave i lona aiga. O le tagata e osi aiga, e loto nuu ma loto Ekalesia. E talanoa i le faatuatua, e lima mafola ma loto alofa. E malie atoatoa Seumanufagai, e mativa mo le galuega a le Atua.

O le aso 17 o Aokuso 2019, i le 8:15 i le afiafi, na pa'i mai ai le tala faanoanoa, ua alu faafuase'i le malaga a le Tama. E ui lava o le kanesa, ae le i faataotolia pe tausua foi lona ma'i. Na vina lava i le Tina ma tamaiti e 'ave ia i le falema'i i le po o le Aso Faraile, ma malaga ai lava i le po o le Aso Toona'i. O le faigata lena ona talia o le tala, aua sa talanoa, ma mafuta i le vaiaso atoatoa, sa faitonu foi ma le aulotu i le Aso Sa, ae ua alu faafuase'i. Ua moni lava ana tala a'o soifua, o le a lava le taimi e finagalo ai le Atua mo ia, e alu lava ma le fiafia.

O le Aso Sa le aso 8 o Setema i le 9:00 i le taeao, na molimoli mai ai lona tino maliu i lo matou faletapua'i, ma matou failotu ai i sauniga masani o le Aso Sa. Sa



# O E UA FAI'ILAGI LE FOLAUGA

## SEUMANUFAGAI AUTAGAVAIA FAAMASANI SEUMANUFAGAI FILO

ou ta'ita'i, o le susuga i le faifeau o Panamā Pouono EFKS Malua Seattle, sa saunia talosaga, a'o le susuga i le faifeau Saitumua Tafaofialii EFKS Vaimasima Utah, sa lauga. Na ave foi le avanoa mo le aulotu ma aiga e fia molimau. Na matagofie le molimau a le Susuga i le Toeaina Penisione o Liki Tiatia, i le la mafutaga ma le tiakono. Fai mai le toeaina, Ia faamanūina ma saga viia pea le suafa o le Atua, ona o Seumanufagai.

O le itula e 3:00 i le afiafi, na tatala aloaia ai ona sauniga e le Pulega i Saute ma le Matagaluega a Amerika. Sa ta'ita'i le susuga i le Toeaina Faatonu o Makerusa Porotesano. O Leago Tanuvasa FS, o le failautusi foi lea a le Matagaluega na faitauina le Tusi Pa'ia, o le susuga a Time Laufili FS, na saunia talosaga, a'o le susuga i le Toeaina Andy Leavasā, na saunia le upu faamafanafana. Na 'au'au le saunoaga a le Toeaina o Andy i le manatu autu o lona lava aso, O Vai o le Ola. O Seumanufagai, na inu malie i le Vai o le Ola, o Iesu Keriso, o le ala foi lona, o le soifua faamanuiaina. Ae na faamamafa foi e le ta'ita'i le taua o le soifua ae 'anoa i luma o le Atua. O le fua aupito sili lona, e fua i ai le soifua aoga o le tagata mo le Atua. E inu malie i le Vai o

le Ola, e fiafia foi e tali atu ma le loto faafetai i le Atua, e ala i le tautua ma le auaunaga.

Sa felanulanua'i molimau a ona uso ma tuafafine malaga mai Samoa o Niusila ma Hawaii. O le toatele foi o le Pulega ma le Matagaluega, sa saafi ma faafetai i le Atua, ona o le mafutaga ma le Tama. Sa molimau foi le Tina i a Lalotoa e tusa o le mafutaga, ona faai'u lea i la'u molimau, e le gata o a'u o le faifeau, a'o a'u foi o lona atalii. Na faaautu la'u molimau i mafaufauga o le . Faatoto e 20:7. E savali ma le tonu le ua amiotonu, e manuia lana fanau pe a mavae atu o ia. E manatu Seumanufagai, o lana tautua ma auauna i le Atua e ala i le Ekalesia, e totō ona manuia i lana fanau.

O le Aso Gafua, 9 o Setema i le 10:00 i le taeao, ona sauniga faai'u. Sa ta'ita'i lava Makerusa Porotesano FT, faitauina le Tusi Pa'ia e Panamā Pouono FS o talosaga o le susuga Tavita Faletagalua FS, a'o le upu faamafanafana na saunia e le susuga i le Toeaina o Selulo Lagoo. Fai mai le toeaina, E mana'omia e le tagata le vave ona tu ma alu i a Iesu, i soo se vaega o lona soifuaga. A'o le saunoaga faaopoopo a le ta'ita'i, na ia faamamafaina ai le tala ia Iopu, e i ai pea tiga ma faigata i le soifuaga. A ia manatua, o loo soifua lava le Atua, na te tau'ave le tagata i laolao matagaofie e to'a i ai. Sa auai le Toeaina Faatonu Matagaluega Malua Fili Matalavea, ma molimau ai foi le

faletua o Pereseti Matalavea, e fai ma sui o lona a'iga i Fu'afu'ā, i Vaiitoomuli Palauli.

Ona matou malaga ai lea i le fanua maliu, mo ona sauniga i le tuugamau. O a'u lava sa ta'ita'i ma faaee le malaga a le Tama. Ona matou pepese faatofā atu ai lea, i le pese a le au Kerisiano, Talofa uso e, tofaina oe. E ala oe pe a mavae le po".

Tama, alu ia oe ma le manuia, mapu atu i aao o le Alofa Tunoa. E le galo oe, e manatua pea au galuega lelei, i le aiga, i le nuu, faapea le Talalelei. Amuia oe, e valaau mai lava lou Matai, o loo faapea ona e fai.

A'o la a le Matai o le galuega, "Le auauna lelei e ma le faamaoni, ulufale maia i le fiafia o lou Alii.

Saunia:

**Filo Taua'ivale (FS)  
EFKSAGAPĒ  
Garden Grove CA, USA**



## PUATOLO TOLUMAFAGA TAUA SETEFANO EPATI

24 Tesema 1938 - 26 Iuni 2019

O le tiakono o le aulotu i Tanoalei'a. Sa soifua mai le aso 24 Tesema 1938, ae na valaauina e lona matai i le aso 26 Iuni 2019. Ua faasolo ina 81 tausaga o lona soifua. O se tasi o aiga faavae o le aulotu i Tanoalei'a talu mai le tausaga 1966.

Sa faaipoipo atu muamua ia Tafaoga Legatasia Pogi Aitu Teo.

---

# O E UA FAI'ILAGI LE FOLAUGA

---

## PUATOLO TOLUMAFAGA TAUA SETEFANO EPATI

Ona toe faaipoipo lea ia Aliitasi Seuseu. E toa valu le fanau, ma o i latou uma na tutupu mai i lenei tamā, e toa selau le aofai. O se tamā alofa e tusa ma le molimau a le fanau, faapea foi le tinā, o le molimau foi lea a le aulotu. O se tagata loto tele, loto i le galuega a le Atua, ma malosi e fai galuega. O ia sa faigaluega toatasi o le aiga,

e fafaga ma faaa' o'oga le fanau. E lima foai ma alofa i isi tagata. E galue e toto mea ai mo lona aiga, aua o lona fanua e maua ai le tele o laau aina e faaaogaina. O se tamā foi e ese le loto ita, ma faigata ona faatea lona le fiafia. Peita'i e maua pea taimi o le laofie, e taumafai ai e faamaopopo mea ua foliga faigata.

Sa faia lona sauniga faale aiga i le fale maliu o Pau Sefo. A o ona toe sauniga sa faia lava lea i le Falesa i Tanoalei'a. O au sa ta'ita'i, o le Susuga ia Kereta Faatonu sa molimoli maia le sa o le tamā i totonu, ma faitauina le Tusi Paia. O le Susuga i le toeaina

ia Siolo Tauati FT sa tatalo, a o le Afioga i le Sea, ia Misiafa Tyrell, o le Matagaluega Metotisi Vaivase Uta, sa saunia le upu faamafanafana. Sa molimau le tinā ia Aliitasi Seuseu i le mafutaga ma le tamā, o tamaita'i o Laumua Setefano sa fai ma sui o le fanau e molimau i lo latou tamā, ma le molimau faale-agaga sa ou saunia. Ona faai'u lea o ona toe sauniga i lona aiga i Tanoalei'a Vaivase-uta, ma faatofa atu i le pese faamavae a le Au uso. Talofa uso e, tofaina oe...Tofa Tolumafaga, manuia lau malaga.

Saunia:

**Enefatu Lesa (FT)**  
**EFKS Tanoalei'a**  
**Vaivase-uta**



---

## SINA FETOAI TIATIA

6 Mati 1936 - 20 Iuni 2019

O le tinā matua o le aulotu i Tanoalei'a. Sa soifua mai i Lelepa i ona matua o Ulai Manu ma Faaloia Faumui, i le aso 6 Mati 1936, ae na valaauina e lona matai i le aso 20 Iuni 2019. Sa faaipoipo atu ia Tiatia Salavea o Avao i le aso 3 Me 1956. E toa 9 le fanau faatasi ai ma fanau fai e to'alua.

O le tausaga e 1985 o loo faamauina ai le avea o lenei aiga ma matafale tumau o lenei aulotu i Tanoalei'a. Ina ua maua lo latou fanua i Tanoalei'a Vaivase uta e nonofo ai. O se tinā e filemu, e le soona tautala, e le lagona foi lona

leo. O le molimau i le tinā alofa ma le agalelei i ona aiga sa leotele i lea aso o molimau a le aiga. O lona toe sauniga sa faia lava i le Ekalesia i Tanoalei'a i le aso 27 Iuni 2019. O au sa ta'ita'i, o le susuga i le faifeau nofoaiga o Kereta Faatonu sa molimoli maia le sa o le tinā i le tapuaiga, ma faitauina le Tusi Paia. O le Afioga i le Sea Misiafa Tyrell sa saunia talosaga. A o le Susuga i le Toeaina Siolo Tauati (FT) sa saunia le upu faamafanafana. O Soo Tavita Fonoti, sa saunia le molimau mo lo latou tinā. O sui o fanau a fanau o Angelhine Leota Savea, ma Christina Naidu. O sui o le aiga o Faamoetauloa Manu. Sa latou molimau i le mafutaga ma le tinā, ma ana galuega lelei sa faia mo le aiga ma fanau. O a'u sa molimau i le soifua faale-agaga o

le tinā. Ona sosoo ai lea ma ona toe sauniga i lona oliolisaga tumau, i lona aiga i Tanoalei'a Vaivase uta. Ma faatofa atu ai i le pese faamavae a le au uso. Talofa uso e, tofaina oe,...

Saunia:

**Enefatu Lesa (FT)**  
**EFKS Tanoalei'a**  
**Vaivase Uta**




# O E UA FAI'ILAGI LE FOLAUGA




**SEUMANUFAGAI  
AUTAGAVAIA  
FAAMASANI  
SEUMANUFAGAI FILO**



**SINA FETOAI  
TIATIA**



**PUATOLO  
TOLUMAFAGA  
TAUA SETEFANO  
EPATI**



## **FUAULI JUNIOR TAITO FARENI**

**11 Iulai 1966 - 19 Aperila 2019**

Sa soifua mai Fuauli i le aso 11/07/1966, ae na faamanava e le Atua ana feau i le aso 19/04/2019 i lona aiga i Laulii lava. Na iai taimi o lona olaga sa aumau ai i Amerika, ma foliga mai i le

talanoaga ma le Susuga i le toeaina ia Fereti Laufili o ia sa fai foi ma tiakono i lea aulotu. Na toe foi mai i Samoa ma sa tautua ma le malosi i le tofi tiakono o lona tuua ia Leati Taito Farení.

O le molimau lava foi lea a si ona tuua, le Afioga i le tiakono Tinā ia Leati, o lona lima taumatau lea i mea uma e fai i le ekalesia, ma sa taua foi e lona toalua o se tagata e agamalie ma tausua, aemaise lava i le faafeagai ai ma ona matua. Sa molimau foi se tasi o le fanau matutua, o se tama e alofa i lana fanau e ui i le tele o taimi e valavala ai. Sa faapea lava foi i le molimau a le Afioga i le Sao Faapito ia Leniu Vainiu. Sa iai taimi na ia faamaopoopoina ai le aumaga a le nuu nei.

O a'u lava na ta'ita'i i ona toe sauniga i le aso 29/04/2019, ma sa matauina lava o lana galuega o le inisinia i taavale afi sa agalelei ai foi i le tele e o tagata ma faatinoaina ai le tautua ma le auaunaga i lona tinā ma lona tofi tiakono. Sa faaaogaina lava foi le upu a Iosua i le nuu o Isaraelu "Ia sauni ni o outou oso" (Iosua 1:10-11) ona faaiu ai lea i lona oliolisaga tumau i lona aiga i Laulii lava ma o matou faamavae atu ai i le pese faatofa a le au Kerisiano Tofa oe le uso, manuia lau malaga.

**Saunia:**  
**Pita Toleafoa (FS)**  
**EFKS Laulii**

